

Na osnovu člana 7., stav (2) Zakona o budžetima u Federaciji Bosne i Hercegovine ( „Službene novine Federacije Bosne i Hercegovine“, broj: 102/13, 9/14, 13/14; 8/15; 91/15; 102/15, 104/16 , 5/18, 11/19 i 99/19) i člana 23., stav (1), tačka 3) Statuta općine Ključ ( „Službeni glasnik općine Ključ“, broj: 3/10 i 3/11 ), Općinsko vijeće općine Ključ, na svojoj X redovnoj sjednici, održanoj dana 27.12.2021. godine, d o n i j e l o j e

## O D L U K U

o izvršavanju Budžeta općine Ključ za 2022. godinu

### I – OPĆE ODREDBE

#### Član 1.

Ovom Odlukom uređuje se:

- a) planiranje, izrada, donošenje i izvršavanje budžeta,
- b) budžetski principi,
- c) zaduživanje, garancije i upravljanje dugom,
- d) pravila fiskalne odgovornosti,
- e) računovodstvo, izvještavanje, nadzor i revizija budžeta i drugih budžetskih korisnika

#### Član 2.

Izrada i izvršavanje budžeta zasniva se na principima tačnosti i zakonitosti budžeta, principu ekonomičnosti i efikasnosti, principu transparentnosti i participativnosti, te principu uravnoteženosti.

#### Član 3.

Budžet mora biti uravnotežen tako da ukupni prihodi i primici pokrivaju ukupne rashode i izdatke. Budžetski korisnici mogu preuzeti obaveze na teret budžeta tekuće godine samo za namjene i do visine utvrđene u posebnom dijelu budžeta, ako su za to ispunjeni svi zakonom i drugim propisima utvrđeni uslovi.

#### Član 4.

Propisi koji imaju finansijske posljedice na budžet moraju biti obrazloženi, odnosno opravdani analizom troškova i koristi. Ako se tokom godine donesu propisi i akti planiranja na osnovu kojih nastaju nove obaveze za budžet, sredstva će se osigurati u budžetu za sljedeću budžetsku godinu u skladu sa projekcijama i mogućnostima.

#### Član 5.

Budžet se sastoji od općeg i posebnog dijela i kapitalnog budžeta.

- 1) Opći dio budžeta čini račun prihoda i rashoda, račun finansiranja i račun kapitalnih primitaka i izdataka.
- 2) Poseban dio budžeta sastoji se od plana rashoda i izdataka budžetskih korisnika iskazanih po vrstama, raspoređenih u tekuće izdatke i kapitalne investicije.
- 3) Kapitalni budžet čine izdvajanja za kapitalne investicije po godinama i izvorima finansiranja.

## Član 6.

(1) Račun prihoda i rashoda budžeta sastoji se od:

a) PRIHODA

- 1) poreznih prihoda
- 2) neporeznih prihoda: prihodi od poduzetništva i imovine, prihodi od taksi i naknada, novčane kazne, prihodi od imovine, prihoda od pružanja javnih usluga, prihoda od vlastitih djelatnosti korisnika budžeta, primljenih transfera i donacija

b) RASHODA

- 1) plaće i naknade troškova zaposlenih
- 2) doprinosa poslodavca i drugi doprinosi
- 3) izdaci za materijal, sitni inventar i usluge
- 4) tekući transferi i drugi tekući rashodi
- 5) kapitalni transferi i
- 6) izdaci za kamate

(2) U računu finansiranja iskazuju se primici od finansijske imovine, primljeni krediti i zajmovi, te izdaci za finansijsku imovinu i otplatu kredita i zajmova.

(3) U računu kapitalnih izdataka i primitaka iskazuju se primici od nefinansijske imovine i izdaci za nefinansijsku imovinu.

## Član 7.

(1) Ukoliko u toku godine zbog nastanka novih obaveza dođe do povećanja rashoda ili se smanje prihodi, Općinski načelnik će donijeti zaključak o obustavljanju izvršavanja pojedinih rashoda ili izdataka u trajanju od 45 dana.

(2) Mjerama privremenog obustavljanja izvršenja budžeta Općinski načelnik može:

- a) predložiti produženje ugovorenih rokova plaćanja
- b) korigovati transfere za sve budžetske korisnike za iznos procenta smanjenja tekućih prihoda u odnosu na plan budžeta, osim transfera za beneficije socijalne zaštite
- c) zaustaviti preuzimanje obaveza

(3) Ukoliko predložene mjere ne daju rezultate pokreće se postupak izmjena i dopuna budžeta, najkasnije u roku od 15 dana prije isteka roka za privremenu obustavu izvršavanja budžeta.

## Član 8.

(1) Budžetski korisnici su: Jedinstveni općinski organ uprave, JU Centar za socijalni rad ,Općinsko pravobranilaštvo, JU Centar za kulturu,obrazovanje i informisanje i JU Općinski fond za komunalne djelatnosti i infrastrukturu.

(2) Korisnik koji u svom razdjelu sadrži potrošačke jedinice, budžetski je za njih nadležan.

## II– IZVRŠAVANJE BUDŽETA

### Član 9.

Budžet općine Ključ izvršava Općinski načelnik općine Ključ.

#### Član 10.

- (1) Sredstva Budžeta osiguravaju se korisnicima koji su u posebnom dijelu Budžeta određeni za korisnike sredstava na pojedinim pozicijama.
- (2) Korisnici odobrena sredstva mogu koristiti samo za namjene koje su određene Budžetom, a u skladu sa svojim godišnjim finansijskim planom.
- (3) Korisnicima nije dozvoljeno da stvaraju obaveze, odnosno rashode ili opterećenje budžetskih pozicija, ako ti rashodi ili opterećenja budžetskih pozicija nisu odobreni u okviru iznosa alociranog za tog korisnika.

#### Član 11.

- (1) Donacije i grantovi, koji nisu planirani u Budžetu, a ostvare se u toku fiskalne godine, namjenski će se koristiti po zaključku kojeg donosi Općinski načelnik, tako što će se povećati prihodovna i rashodovna strana za isti iznos.
- (2) Služba za finansije i trezor na osnovu pismenog dokaza o uplaćenju donaciji ili drugoj odgovarajućoj dokumentaciji vrši povećanje budžeta kako na rashodovnoj, tako i na prihodovnoj strani.

#### Član 12.

- (1) Korisnici koriste sredstva Budžeta u skladu sa svojim godišnjim finansijskim planom, a po dinamici utvrđenoj mjesečnim operativnim planovima.
- (2) Budžet se izvršava na osnovu mjesečnih operativnih planova za izvršavanje Budžeta u skladu sa raspoloživim sredstvima.

#### Član 13.

Postupak nabavke roba, usluga i radova izvršavat će se u skladu sa odredbama Zakona o javnim nabavkama Bosne i Hercegovine („Službeni glasnik BiH“, broj: 39/14).

Aktivnosti u Jedinственном općinskom organu uprave općine Ključ koje za sobom nose trošenje budžetskih sredstava i zaključivanje dužničko-povjerilačkih odnosa, ne mogu biti pokrenuta bez prethodne saglasnosti Službe za finansije i trezor. Ostali budžetski korisnici aktivnosti koje za sobom nose trošenje budžetskih sredstava i zaključivanje dužničko-povjerilačkih odnosa pokreću uz saglasnost rukovodioca budžetskog korisnika.

#### Član 14.

Izuzetno, zbog neusklađenosti priliva sredstava u Budžet prema mjesečnim planovima izdataka, Služba za finansije i trezor može predložiti dinamiku odobravanja sredstava korisnicima uz saglasnost Općinskog načelnika.

#### Član 15.

Služba za finansije i trezor izvršava mjesečne finansijske planove po korisnicima i izdacima u skladu sa raspoloživim sredstvima.

#### Član 16.

- (1) Korisnici su obavezni Službi za finansije i trezor dostavljati tomjesečne finansijske planove iskazane po mjesecima najkasnije do 25. u mjesecu prije početka kvartala.

(2) Ako korisnik Službi za finansije i trezor i ne podnese prijedlog tromjesečnog finansijskog plana u roku iz stava (1) ovog člana, tromjesečni plan za tog korisnika utvrđuje Služba.

#### Član 17.

Na prijedlog budžetskog korisnika, Općinski načelnik može donijeti Zaključak o prestrukturiranju rashoda i izdataka u okviru ukupnog iznosa odobrenog za budžetskog korisnika, a najviše do 10 % ukupno odobrenih rashoda i izdataka za korisnika.

#### Član 18.

Budžet općine Ključ se izvršava u skladu sa njegovim likvidnim mogućnostima po slijedećim prioritetima:

- a) servisiranje duga i kamata ( kredit )
- b) sudske presude i izvršenja
- c) plaće i naknade zaposlenih
- d) materijalni i drugi troškovi neophodni za rad budžetskih korisnika
- e) obaveze iz prethodne godine
- f) naknade za rad u Općinskom vijeću i komisijama Općinskog vijeća i ostale komisije
- g) tekući grantovi i subvencije,
- h) kapitalni grantovi i
- i) kapitalni izdaci

#### Član 19.

(1) Ukoliko se naknadno utvrdi da je isplata sa budžeta izvršena nezakonito ili nenamjenski budžetski korisnik je dužan odmah zahtijevati povrat budžetskih sredstava na JRT.

(2) Ako se budžetskim nadzorom utvrdi da su sredstva korištena suprotno zakonu, Općinski načelnik putem Službe za finansije i trezor donosi rješenje o povratu sredstava na JRT.

#### Član 20.

(1) Svi javni prihodi i primici Budžeta, uključujući i prihode koje korisnici ostvaruju obavljanjem vlastite djelatnosti uplaćuju se na JRT. Uplate na osnovu ostvarenih vlastitih prihoda budžetskih korisnika evidentirat će se kao vlastiti prihod svakog korisnika u glavnoj knjizi trezora.

(2) Korisnici su obavezni da prilikom izrade svog finansijskog plana planiraju rashode koji će biti pokriveni iz vlastitih prihoda.

#### Član 21.

Ako u toku fiskalne godine dođe do povećanja ili smanjenja prihoda ili opravdanog povećanja rashoda Budžeta vrše se njegove izmjene i dopune, po istom postupku kao i kod donošenja Budžeta vodeći računa o načelu njegovog uravnoteženja.

#### Član 22.

Pogrešno ili više uplaćeni prihodi na račun budžeta u tekućoj godini vraćaju se uplatiocima na teret tih prihoda na osnovu rješenja koje donosi Općinski načelnik uz zahtjev budžetskog korisnika i uplatioca sredstava.

(2) Povrat više ili pogrešno uplaćenih prihoda koji nisu uplaćeni u tekućoj godini vrše se sa pozicije 614800 naknada za povrat više uplaćenih sredstava na osnovu rješenja koji donosi Općinski načelnik .

#### Član 23.

Visina dnevnica i ostalih troškova koji nastaju u vezi sa službenim putovanjima za sve korisnike određuje se na osnovu Uredbe o naknadama troškova za službena putovanja ( „Službene novine Federacije BiH“, broj: 44/16 ).

#### Član 24.

(1) Sredstva tekuće rezerve planirana u budžetu koriste se za nepredviđene namjene za koje u budžetu nisu planirana sredstva ili za namjene za koje se tokom godine pokaže da za njih nisu utvrđena dovoljna sredstva jer ih pri planiranju budžeta nije bilo moguće predvidjeti.

(2) O korištenju sredstava Tekuće rezerve odlučuje Općinski načelnik o čemu donosi Zaključak na prijedlog Službe za stručne poslove Općinskog načelnika i Općinskog vijeća, opću upravu i društvene djelatnosti . Budžetska izdvajanja za tekuću rezervu ne smiju preći iznos od 3 % planiranih prihoda bez primitaka.

#### Član 25.

(1) Ako se tokom godine, na osnovu zakona i drugog propisa, poveća djelokrug ili nadležnost korisnika što zahtijeva povećana sredstva ili se osnuje novi budžetski korisnik, sredstva za njegove troškove osiguravaju se iz Tekuće rezerve Budžeta.

(2) Ako se tokom godine, na osnovu zakona i drugog propisa, umanjí djelokrug ili nadležnost korisnika, što zahtijeva smanjena sredstva ili sam budžetski korisnik prestane postojati, neutrošena sredstva za njegove izdatke prenose se u Tekuću rezervu budžeta ili na korisnika koji preuzme njegove poslove uz odobrenje Općinskog načelnika.

Korisnici su odgovorni za zakonitost, svrsishodnost, efikasnost i za ekonomično raspolaganje budžetskim sredstvima.

#### Član 26.

Naknade i troškovi zaposlenih koriste se se u skladu sa zakonima, Kolektivnim ugovorom, podzakonskim aktima i internim aktima Općine, u skladu sa odobrenim finansijskim planom za budžetske korisnike.

Osnovica za obračun plaće jedinstvenog općinskog organa uprave utvrđuje Općinski načelnik u pregovorima sa Sindikatom. Na visinu osnovice za budžetske korisnike – javne ustanove saglasnost daje Općinski načelnik.

#### Član 27.

Rashodi utvrđeni na ekonomskim kodovima 613200, 613300 i 613700 –( Program ZKP) Program zajedničke komunalne potrošnje finansira se iz sredstava komunalne naknade, sredstava po Odluci o kumunalnim djelatnostima , te sredstvima utvrđenim članom 93. i 96. Zakona o cestama ,a po usvojenom Programu od strane Općinskog vijeća.

#### Član 28.

Sredstva utvrđena ekonomskim kodom 613500 – izdaci za prevoz đaka koristit će se za sufinansiranje troškova prevoza učenika srednjih škola na način da se vrši plaćanje faktura dobavljačima sa kojima je potpisan ugovor o sufinansiranju troškova prevoza i to za učenike koji su ostvarili pravo na sufinansiranje troškova prevoza po Pravilniku o participiranju općine Ključ u troškovima prevoza redovnih učenika srednjih škola na području općine Ključ.

#### Član 29.

Sredstva utvrđena ekonomskim kodom 613700 – usluge popravke i održavanja zgrada (Fond) koriste se u skladu sa Zakonom o korištenju, upravljanju i održavanju zajedničkih dijelova i uređaja zgrada („Službeni glasnik USK-a“ broj:32/12), a na prijedlog direktora JU Općinski fond za komunalnu djelatnost i infrastrukturu Ključ i Zaključka Općinskog načelnika.

#### Član 30.

(1) Sredstva utvrđena ekonomskim kodom 613900 – obilježavanje značajnih datuma i događaja doznačavat će se po Programu kojeg donosi Općinski načelnik na prijedlog Odbora za obilježavanje značajnih datuma i Službe za stručne poslove Općinskog načelnika i Općinskog vijeća, opću upravu i društvene djelatnosti. Program mora da sadrži i finansijske pokazatelje do iznosa koji je predviđen Budžetom.

(2) Sredstva sa koda 613900 – obilježavanje značajnih datuma i događaja isplaćuju se na osnovu zaključka Općinskog načelnika, a u skladu sa usvojenim Programom.

#### Član 31.

Sredstva utvrđena ekonomskim kodom 613900 - Smještaj u ustanove socijalne zaštite se finansira iz Kantonalnog budžeta po pravosnažnim rješenjima o ostarivanju prava na smještaj u ustanove socijalne zaštite na koje je dalo saglasnost Resorno ministarstvo i participacija od strane korisnika. Isplate se vrše ustanovama socijalne zaštite na osnovu mjesečnih faktura i zaključenih ugovora o smještaju korisnika po doznačavanju namjenskih sredstava od Resornog ministarstva.

#### Član 32.

Sredstva utvrđena ekonomskim kodom 613900 – projekat rješavanja 12 stambenih jedinica će se vršiti po doznačavanju sredstava od strane Kantonalnog fonda za pomoć u stambenom zbrinjavanju i zapošljavanju boračkih populacija, prognanih osoba i socijalno ugroženih kategorija, a na osnovu zahtjeva Službe za prostorno uređenje, stambeno komunalne, imovinsko pravne i geodetske poslove i zaključka Općinskog načelnika.

#### Član 33.

Sredstva utvrđena ekonomskim kodom 613900 nabavka i postavljanje tabli sa kućnim brojevima i nazivima ulica na području općine utrošit će se u skladu sa Odlukom Općinskog vijeća.

#### Član 34.

Sredstva utvrđena ekonomskim kodom 613900 naknada za održavanje zajedničkih dijelova i uređaja zgrada utrošit će se po računima JU Općinski fond za komunalne djelatnosti i infrastrukturu Ključ na ime naknade za stanove u vlasništvu općine date privremenim korisnima socijalne kategorije.

#### Član 35.

Sredstva utvrđena ekonomskim kodom 614100 Izborna komisija realizirat će se se u skladu sa finansijskim planom Općinske izborne komisije. Naknada za rad članova Općinske izborne komisije isplaćivat će se na osnovu Odluke o visini naknade za rad članova Općinske izborne komisije Ključ broj: 05-02-1156/16 od 04.05.2016. godine. Ostali troškovi vezani za rad i provođenje izbora isplaćivat će se isključivo na osnovu zahtjeva i priložene finansijske dokumentacije, a u skladu sa usvojenim finansijskim planom.

#### Član 36.

Sredstva utvrđena ekonomskim kodom 614200 naknada za sanaciju štete uslijed požara realizovat će se na osnovu izvještaja sudskog vještaka građevinske struke i Sporazuma o naknadi nastale štete

#### Član 37.

Raspodjela sredstva utvrđena ekonomskim kodom 614200- stipendije vršit će se po utvrđenim kriterijima i Pravilnika za dodjelu stipendija redovnim studentima.

#### Član 38.

Raspodjela sredstva utvrđena ekonomskim kodom 614200 - alternativni i privremeni smještaj vršit će na osnovu potpisanih Ugovora o dodjeli novčanih sredstava za privremeni smještaj između Općinskog načelnika i korisnika sredstava, a na prijedlog Službe za prostorno uređenje stambeno-komunalne, imovinsko-pravne i geodetske poslove.

#### Član 39.

Sredstva utvrđena ekonomskim kodom 614200 – pomoć porodiljama isplaćivat će se na osnovu Odluke Općinskog načelnika, a po rješenju o utvrđivanju prava na naknadu koje donosi direktor JU Centar za socijalni rad na osnovu zahtjeva stranke ili po službenoj dužnosti, ako raspolaže sa dovoljno podataka na osnovu kojih bi se moglo utvrditi pravo na naknadu.

#### Član 40.

Sredstva utvrđena ekonomskim kodom 614200 – jednokratne novčane pomoći će se dodjeljivati na osnovu Zakona o socijalnoj zaštiti, zaštiti civilnih žrtava rata i zaštiti porodice sa djecom

#### Član 41.

Sredstva utvrđena ekonomskim kodom 614200 jednokratne novčane pomoći - subvencioniranje troškova vode i odvoza smeća za korisnike stalne novčane pomoći će se dodjeljivati na osnovu Odluke o subvencioniranju dijela troškova potrošnje vode i odvoza smeća za korisnike stalne novčane pomoći za 2022. godinu koju donosi Općinsko vijeće.

#### Član 42.

Sredstva utvrđena ekonomskim kodom 614200 jednokratne novčane pomoći - subvencioniranje socijalnog stanovanja ( korisnici po programu CEB II i RSP BH 6 ) će se dodjeljivati na osnovu Odluke o subvencioniranju plaćanja naknada i režijskih troškova korisnika za 2022. godinu koju donosi Općinsko vijeće.

#### Član 43.

Sredstva utvrđena ekonomskim kodom 614200 subvencioniranje rješavanja stambenog pitanja mladih realizirat će se na osnovu Javnog poziva i odabira korisnika koji će ispunjavati uslove propisane Pravilnikom.

#### Član 44.

Sredstva utvrđana ekonomskim kodom 614200 i to :osposobljavanje za život i rad, naknada za porodilje u radnom odnosu, naknada za porodilje van radnog odnosa, hraniteljstvo, materijalna socijalna pomoć, tuđa pomoć i njega, dječiji dodatak, naknada za treće i svako naredno živo rođeno dijete, čekanje na zaposlenje isplaćivat će se na osnovu pravosnažnih rješenja o priznavanju prava, za koja će se doznačiti namjenska sredstava od strane Ministarstva zdravstva, rada i socijalne politike odnosno Budžeta USK u skladu sa važećim Zakonom o socijalnoj zaštiti.

#### Član 45.

Sredstva utvrđana ekonomskim kodom 614200 - jednokratna novčana pomoć – Dječija nedelja isplaćivat će se korisnicima po pravosnažnim rješenjima donešenim na osnovu Odluke resornog ministarstva o raspoređivanju prikupljenih sredstava za Dječiju nedelju.

#### Član 46.

Sredstva utvrđana ekonomskim kodom 614200 - medicinsko vještačenje - Isplatu povrata troškova medicinskog vještačenja vršit će se po doznačavanju namjenskih sredstava od strane Resornog ministarstva svim neratnim invalidima koji su ostvarili pravo u skladu sa važećim Zakonom o socijalnoj zaštiti.

#### Član 47.

Sredstva utvrđena ekonomskim kodom 614300 – grantovi neprofitnim organizacijama - parlamentarne grupe raspoređuju se na način da se 30% sredstava raspoređuje jednako svim parlamentarnim grupama, 60% od ukupnog iznosa raspoređuje se srazmjerno broju vijećničkih mjesta koje svaka parlamentarna grupa ima u trenutku dodjele mandata, dok se 10% od ukupnog iznosa raspoređuje parlamentarnim grupama srazmjerno broju vijećničkih mjesta koja pripadaju manje zastupljenom spolu.

#### Član 48.

Raspodjela sredstva utvrđena ekonomskim kodom 614300 - Vijeće mladih općine Ključ raspoređivat će na osnovu dostavljenih zahtjeva, a izvršavat će se na osnovu zaključka Općinskog načelnika

#### Član 49.

Sredstva utvrđena ekonomskim kodom 614300 – grant neprofitnim organizacijama – Vjerske zajednice će se razmatrati na osnovu dostavljenih zahtjeva vjerskih zajednica, a isplaćivat će se na osnovu zaključka Općinskog načelnika na prijedlog Službe za stručne poslove Općinskog načelnika i Općinskog vijeća, opću upravu i društvene djelatnosti.

#### Član 50.

Sredstva utvrđena ekonomskim kodom 614300 – implementacija Strategije za izjednačavanje mogućnosti za osobe sa invaliditetom i pomoć projektima inkluzije i poboljšanja rada sa djecom sa posebnim potrebama će se razmatrati na osnovu dostavljenih zahtjeva, a izvršavat će se na osnovu zaključka Općinskog načelnika.

#### Član 51.

Sredstva utvrđena ekonomskim kodom 614300 udruženje građana rasporedit će se za projekte odabrane po javnom pozivu raspisanom u skladu sa Odlukom o kriterijima, načinu i postupku raspodjele sredstava nevladinim organizacijama („ Službeni glasnik općine Ključ“ broj: 9/12 ).

#### Član 52.

Sredstva utvrđena ekonomskim kodom 614300 – Fondacija za utvrđivanje istine civilnih stanovnika i ratnih zarobljenika Bosanske krajine će se razmatrati na osnovu dostavljenih zahtjeva, a izvršavat će se na osnovu zaključka Općinskog načelnika.

#### Član 53.

Sredstva utvrđena ekonomskim kodom 614300 – Sportski savez isplaćivat će se mjesečno u skladu sa raspoloživim sredstvima, do iznosa planiranim budžetom. Sportski savez Općine Ključ u obavezi je da po usvajanju Budžeta za 2022. godinu dostavi Općinskom vijeću Plan rada i finansijski plan na usvajanje.

#### Član 54.

Sredstva utvrđena ekonomskim kodom 614300 Memorijalni centar Srebrenica-Potočari, Spomen obilježje i mezarje za žrtve genocida iz 1995 godine Srebrenica isplaćivat će se na osnovu potpisanog memoranduma.

#### Član 55.

Sredstva utvrđena ekonomskim kodom 614400 – subvencije javnim preduzećima – volonteri , prvo zaposlenje po programu Federalnog zavoda za zapošljavanje doznačavat će se javnim preduzećima na osnovu Sporazuma zaključenog između Općinskog načelnika i javnih preduzeća, a isplaćivat će se na osnovu mjesečnih zahtjeva javnih preduzeća.

#### Član 56.

Isplata grantova na ekonomskim kodovima 614300 i 614400 isplaćivat će se mjesečno u skladu sa raspoloživim sredstvima, do iznosa planiranim budžetom. Primaoci grantova po isteku kalendarske godine dužni su podnijeti izvještaj o utrošku istih. Korisnicima grantova koji nisu podnijeli izvještaj o utrošenim sredstvima granta po isteku kalendarske godine bit će obustavljene dalje isplate sredstava iz budžeta sve do podnošenja istih.

#### Član 57.

Sredstva utvrđena ekonomskim kodom 614500 Fondacija Mozaik – Dijaspورا program će se realizirati na osnovu potpisanog memoranduma.

#### Član 58.

Za praćenje troškova mjesnih zajednica zadužuje se Šef Službe za stručne poslove Općinskog načelnika Općinskog vijeća, opću upravu i društvene djelatnosti.

#### Član 59.

Sredstva utvrđena ekonomskim kodom 614500 – podsticaj poljoprivrednoj proizvodnji realizirat će se na osnovu Programa kojeg donosi Općinski načelnik na prijedlog Službe za razvoj, privredu i civilnu zaštitu.

#### Član 60.

Sredstva utvrđena ekonomskim kodom 614500 – subvencije za poticaj razvoja, poduzetništva i obrta realizirat će se na osnovu Programa kojeg donosi Općinski načelnik na prijedlog Službe za razvoj, privredu i civilnu zaštitu.

#### Član 61.

Sredstva utvrđena ekonomskim kodom 614500 subvencije za poticaj razvoja, poduzetništva i obrta ( subvencioniranje kamata kod Razvojne banke ) isplaćivat će se na osnovu Odluke o subvenciji kamata koju donosi Općinski načelnik i otplatnog plana korisnika kredita kojeg dostavlja Razvojna banka Federacije Bosne i Hercegovine.

#### Član 62.

Sredstva na kodu 615000 - kapitalni grantovi: sufinansiranje projekata , JP“ Ukus“ sufinansiranje projekta nabavke visokotlačne prikolice za čišćenje kanalizacionih kolektora; Udruženje penzionera vojnih osiguranika USK ; Sportsko udruženje Kamičak i Medžlis islamske zajednice realizirat će se na osnovu Zaključka Općinskog načelnika, a isplaćivat će se uz predočavanje fakture, situacije o izvršenim radovima, nabavci robe, izuzev ako ugovorom nije definisano plaćanje avansa dobavljačima. Korisnici grantova dužni su dostaviti izvještaj o namjenskom utrošku sredstava.

#### Član 63.

Sredstva na kodu 615000 - kapitalni grantovi: sanacija porodičnih kuća – koristit će se za sanaciju kuća korisnika iz reda raseljenih osoba i izbjeglica, povratnika u BiH, korisnika alternativnog i nužnog smještaja i socijalnih slučajeva po odluci Općinskog načelnika i potpisanim ugovorom sa izvođačem u skladu sa Zakonom o javnim nabavka BiH.

#### Član 64.

Sredstva utvrđena pod ekonomskim kodom 616000 – izdaci za kamate i 823000 otplata dugova izvršavat će se po dospjelosti plaćanja.

#### Član 65.

Sredstva utvrđena ekonomskim kodom 821000- Projekat CEB II (izgradnja stambenih jedinica) koristit će se za finansiranje obaveza Općine Ključ po potpisanom Sporazumu o saradnji na sprovođenju državnog projekta „Zatvaranje kolektivnih centara i alternativnih smještaja pružanjem javnih stambenih rješenja“ u okviru projekta CEB II – podprojekat općina Ključ.

#### Član 66.

Sredstva utvrđena ekonomskim kodom 821000- Projekat RSP BH 6 (izgradnja stambenih jedinica) koristit će se za finansiranje obaveza Općine Ključ po potpisanom Sporazumu o saradnji na provođenju Pod-projekta BiH6- Državnog projekta stambenog zbrinjavanja u okviru Regionalnog stambenog programa.

#### Član 67.

(1) Sredstva od vodnih naknada su namjenjena za uređenje i zaštitu pitkih voda i vodotoka druge kategorije pripadajućih općini Ključ. Sredstva će se realizovati na osnovu Programa uređenja i održavanja vodotoka i vodnog dobra II kategorije na području općine Ključ i Plana zaštite od poplava i leda, erozija i bujica i vanrednog zagađenja voda II kategorije kojeg usvaja Općinski načelnik na prijedlog Službe za prostorno uređenje, stambeno komunalne, imovinsko pravne i geodetske poslove i JU „Općinski fond za komunalne djelatnosti i infrastrukturu“ Ključ.

(2) Nerealizovani projekti iz prethodnih godina koji su odobreni Odlukama o načinu utroška sredstava od vodnih naknada iz prethodnih godina i Zaključcima Općinskog načelnika koji su doneseni na osnovu člana 4. pomenute Odluke isplaćivat će se po realizaciji projekta.

(3) Sredstva od vodnih naknada – novi projekti planirani za 2022. godinu se ne mogu koristiti dok se ne donese Program o načinu utroška sredstava od vodnih naknada za 2022. godinu.

#### Član 68.

(1) Sredstva od indirektnih poreza na ime finansiranja autoceste BiH realizovat će se na osnovu Programa utroška sredstava od indirektnih poreza na ime finansiranja autoceste BiH kojeg usvaja Općinski načelnik na prijedlog Službe za prostorno uređenje, stambeno komunalne, imovinsko pravne i geodetske poslove i JU „Općinski fond za komunalne djelatnosti i infrastrukturu“ Ključ.

(2) Nerealizovani projekti iz prethodnih godina koji su odobreni Odlukom o načinu utroška sredstava od vodnih naknada iz prethodnih godina i Zaključcima Općinskog načelnika koji su doneseni na osnovu člana 4. pomenute Odluke isplaćivat će se po realizaciji projekta .

(3) Sredstva od indirektnih poreza na ime finansiranja autoceste BiH – novi projekti planirani za 2022. godinu se ne mogu koristiti dok se ne donese Program o načinu utroška sredstava od indirektnih poreza na ime finansiranja autoceste BiH za 2022. godinu.

#### Član 69.

(1) Sredstva od naknade za korištenje državnih šuma u 2022 godini će se koristiti za sufinansiranje projekata i podsticaj poljoprivrednoj proizvodnji.

(2) Nerealizovani projekti iz prethodnih godina koji su odobreni Odlukom o načinu utroška sredstava od šumskih naknada iz prethodnih godina i Zaključcima Općinskog načelnika koji su doneseni na osnovu člana 4. pomenute Odluke isplaćivat će se po realizaciji projekta.

#### Član 70.

(1) Sredstva od koncesija će se realizovati na osnovu Programa o načinu utroška sredstava od koncesija kojeg donosi Općinsko vijeće na osnovu prijedloga Službe za prostorno uređenje, stambeno komunalne i imovinsko – pravne i geodetske poslove i JU „Općinski fond za komunalne djelatnosti i infrastrukturu“ Ključ.

(2) Nerealizovani projekti iz prethodnih godina koji su odobreni Odlukom o načinu utroška sredstava od koncesija iz prethodnih godina i Zaključcima Općinskog načelnika koji su doneseni na osnovu člana 4. pomenute Odluke isplaćivat će se po realizaciji projekta.

(3) Sredstva od koncesija – novi projekti planirani za 2022. godinu se ne mogu koristiti dok se ne donese Program o načinu utroška sredstava od koncesija za 2022. godinu.

#### Član 71.

Sredstva po osnovu posebnih naknada za zaštitu od prirodnih i drugih nesreća koristiće se u skladu sa Zakonom o zaštiti i spašavanju ljudi i materijalnih dobara od prirodnih i drugih nesreća („Službene novine

Federacije Bosne i Hercegovine“ broj: 39/03, 22/06 i 43/10 ); Odlukom o uslovima i načinu korištenja sredstava ostvarenih po osnovu posebne naknade za zaštitu od prirodnih i drugih nesreća („Službene novine Federacije Bosne i Hercegovine“ broj:4/12,80/13 ) i Planom utroška sredstava Općinskog štaba.

#### Član 72.

Sredstva utvrđena ekonomskim kodom 821000 – kapitalne investicije ( sredstva od nafte i naftnih derivata ) realizovat će se na osnovu Programa o načinu utroška sredstava od nafte i naftnih derivata kojeg usvaja Upravni odbor JU Općinski fond za komunalne djelatnosti i infrastrukturu općine Ključ uz saglasnost Općinskog načelnika.

#### Član 73.

Za sredstva koja su obezbjeđena od viših nivoa vlasti i drugih donatora, a čiju će implementaciju vrsiti druga javna ustanova ili preduzeće sačinjava se i potpisuje Ugovor o implementaciji sredstava.

### III - ZADUŽIVANJE I UPRAVLJANJE DUGOM

#### Član 74.

(1) Kratkoročni dug može nastati samo radi finansiranja deficita nastalog iz gotovinskog toka i otplatit će se u fiskalnoj godini u kojoj je zaduženje i nastalo. Ovaj dug neće biti predmet refinansiranja ili produženja nakon isteka te fiskalne godine, te ni u kom vremenskom periodu tokom fiskalne godine neće preći 5 % prihoda ostvarenih u prethodnoj fiskalnoj godini i neće biti nikakvog neizmirenog kratkoročnog zaduženja u periodu od uzastopnih 30 dana u okviru te fiskalne godine.

(2) Općina se može zadužiti za:

- a) finansiranje budžetskog deficita proizašlog iz gotovinskog toka
- b) finansiranje budžetskog deficita općine
- c) finansiranje kapitalnih investicija
- d) refinansiranje ukupnog ili dijela neizmirenog duga
- e) za plaćanje garancija općine u potpunosti ili djelimično, u slučaju da zajmoprimac ne ispuni svoje finansijske obaveze
- f) plaćanje obaveza po osnovu unutrašnjeg duga u skladu sa zakonom.

### IV – FISKALNA ODGOVORNOST

#### Član 75.

(1) Rukovodilac budžetskog korisnika je odgovoran za:

- a) zakonito i namjensko korištenje sredstava
- b) efikasno i uspješno funkcioniranje sistema finansijskog upravljanja i kontrolu u okviru budžetom utvrđenih sredstava.

(2) Rukovodilac je dužan svake godine za prethodnu budžetsku godinu za period u kojem je obavljao poslove rukovodioca popuniti izjavu o fiskalnoj odgovornosti.

#### Član 76.

Korisnici su odgovorni za zakonitost, svrsishodnost, efikasnost i za ekonomično raspolaganje budžetskim sredstvima.

## V – FINANSIJSKO IZVJEŠTAVANJE

### Član 77.

Rukovodioci budžetskih korisnika odgovorni su za računovodstvo, unutrašnju kontrolu i nadzor transakcija u organu kojim rukovode.

### Član 78.

Služba za finansije i trezor je dužna dostaviti periodične izvještaje Ministarstvu finansija USK-a u roku od 20 dana po isteku obračunskog perioda, a periodične i godišnje izvještaje za period od 01.januara. do 31. decembra do 5.marta tekuće godine.

### Član 79.

Budžetski korisnici dužni su dostaviti periodične izvještaje za periode: od 01.01. do 31.03; od 01.01. do 30.06. i od 01.01. do 30.09. Službi za finansije i trezor u roku od 20 dana po isteku obračunskog perioda, a za period od 01.01. do 31.12. do 28 februara tekuće godine.

## VI – KAZNENE ODREDBE

### Član 80.

Odgovorno lice budžetskog korisnika kažnjava se za prekršaj koji napravi, u skladu sa odredbama člana 102. i 103. Zakona o budžetima u Federaciji Bosne i Hercegovine („Službene novine Federacije Bosne i Hercegovine“ broj:102/13, 9/14, 13/14, 8/15, 91/15, 102/15, 104/16, 5/18, 11/19 i 99/19 ).

## VII– ZAVRŠNE ODREDBE

### Član 81.

Ova Odluka stupa na snagu danom donošenja, a objavit će se u „Službenom glasniku općine Ključ“ i primjenjivat će se za fiskalnu 2022.godinu.

Broj: 02-02-2353/21

Ključ, 28 .12.2021. godine

PREDSJEDAVAJUĆA OPĆINSKOG VIJEĆA

Emina Velić, prof.

## O B R A Z L O Ž E N J E

### PRAVNI OSNOV ZA DONOŠENJE

Članom 7., stav (1) Zakona o budžetima u Federaciji BiH propisano je da Budžet donosi Parlament Federacije Bosne i Hercegovine, zakonodavna tijela kantona, odnosno gradska i općinska vijeća, za budžetsku godinu koja odgovara kalendarskoj godini i to prije početka godine na koju se odnosi.

Nadležnosti Općinskog vijeća kao predstavničkog tijela propisane su odredbama člana 21. Zakona o lokalnoj samoupravi USK, što je učinjeno i u odredbama člana 23. Statuta općine Ključ.

Prema tome, cijenimo da je pravni osnov sadržan u citiranim zakonskim, odnosno statutarnim odredbama.

### RAZLOZI ZA DONOŠENJE

Imajući u vidu citirane zakonske odredbe, kao i odredbu člana 113. Statuta općine Ključ, odnosno potrebu za normalnim finansijskim funkcionisanjem Organa uprave općine Ključ i drugih budžetskih korisnika smatramo da je potrebno na vrijeme donijeti Budžet općine Ključ, odnosno u skladu sa Zakonom i Statutom.

Kako bi postojao pravni osnov za izvršavanje Budžeta općine Ključ za 2022. godinu potrebno je donijeti Odluku kao u prijedlogu, a koju Odluku donosi Općinsko vijeće, pa u tom smislu predlažemo donošenje ove Odluke u predloženom tekstu.

Ključ, 28.12.2021. godine

OBRADIVAČ  
Služba za finansije i trezor

Nijaz Delić, dipl.ecc

PREDLAGAČ  
OPĆINSKI NAČELNIK

Nedžad Zukanović, prof.